

雪履尋碑錄卷十二

清宗室盛集錄

朕惟誼重酬庸宜先忠烈恩隆念舊用展懿親況乃大節炳於寰區
令聞傳於戚里優崇之典必首及焉所以表純臣旌淑範也爾佟國
綱德比圭璋志同金石職司環衛寵渥素優爵冠班聯勤勞夙著居
內則趨承禁籙在外則戮力疆場敵愾捐軀勲業流傳於竹帛易名
賜卹恩光照耀於旂常既抒爲國之忱復播齊家之化爾他他喇氏
毓自高門歸於鼎族德容祇愼度光協於珩璜禮教修明行罔愆於
箴史勤相夫之內則勸裕後之宏規並表幽阡爰彰特典於戲青珉
壯色勵臣節於千秋彤管流徽樹壺儀於奕世貽之後嗣永示光榮
雍正元年賜進士出身署理日講起居注官翰林院檢討張廷珩敬
書

維雍正元年歲次癸卯八月戊申朔越八日乙卯皇帝遣經筵講官
太子大保禮部尙書張廷玉諭祭於太子太傅保和殿大學士兼禮
部尙書加六級致仕加少傅兼太子太傅諡文靖王熙之靈曰任隆
密勿端賴賢臣世際承平每懷舊德苟贊襄之烈克著於生前斯奠
醑之榮宜加乎身後爰稽祀典特沛恩綸爾王熙學術閎深才猷練
達早從藝苑入侍經筵既領袖乎清班足楷模乎庶職振紀綱於憲
府杼籌策於中樞進秉國鈞久襄機務惟篤棐不懈於夙夜故禮遇
無聞於初終雖引年而錫予便蕃秩崇保傅迨既沒而恩施稠疊典
備哀榮朕嗣續丕基追思碩輔潔苾芬而寵錫煥綸綍以丕宣於戲
歲月遷流悼老成之莫覲簡編照耀覺風範之常存惟靈有知尙其
歆格

奉天承運皇帝制曰華胄清資佑啓必原於嚴父令儀碩望蕃昌聿

振於石門爰渙國恩用彰家訓爾齊色乃內閣學士兼禮部侍郎軍功議敘拖沙喇哈番加三級朝爾岱之父操修醇粹啟逼勤劬儒席傳珍琢就珪璋之器良材肯構蔚爲臺閣之英門祚方新寵章洊被茲以覃恩贈爾爲資政大夫內閣學士兼禮部侍郎軍功議敘拖沙喇哈番加三級錫之誥命於戲承家有子聿昭孝治之風被命自天用作義方之勸式承茂獎追念德音制曰推恩邇本爰錫慶於親闈稟訓入官並歸功於母教式頒渥典用播嘉聲爾內閣學士兼禮部侍郎軍功議敘拖沙喇哈番加三級朝爾岱之母韋氏順以成夫勤於課子宅能三徙夙成俎豆之容織就七襄早晨文章之緒徽音久著寵命宜加茲以覃恩贈爾爲夫人於戲鴻章疊布尙伸慈孝之思闔澤長流彌篤令共之誼廣宣休問永樹芳儀雍正元年十二月二

十三日

頭等候巴渾德碑文朕惟國家弘獎舊績篤念前勞生旣錫以寵班
歿更加之殊禮所以隆飾終之義重易名之典也爾巴渾德居心克
愼奉職維勤早宿衛於禁廷持躬匪懈泊典戎於楚甸專閫宣勞屢
授統軍勵潔清而自好常參議政贊機務以抒誠雖臣子分在馳驅
無忘精白而朝廷眷茲故舊不靳寵榮賻以帑金賙之上駟勅王臣
而輓送用彰優卹之文予祭葬以推恩聿著酬之禮式循彝憲諡曰
恪恭嗚呼馬鬣新封珉石煥松楸之色龍章載賁金泥增泉壤之光
用示深仁永垂不朽雍正二年月日

皇清誥贈資政大夫都公諱達哈之墓雍正三年歲次乙巳四月穀
旦敬立孫圖理琛塔克興阿伊靈阿費揚古皇清誥贈資政大夫哲
公諱備之墓雍正三年歲次乙巳四月穀旦敬立男圖理琛塔克興
阿伊靈阿費揚古

御製光祿大夫巡撫湖廣等處地方兼提督軍務都察院右副都御史加六級諡勤恪納齊喀碑文朕惟撫綏要地表率羣僚必資篤棗之臣以重旬宣之寄念成勞之猶在宜渥典之攸加所以示酬庸昭優卹也爾納齊喀祇慎持躬靖共矢志久居郎署懍夙夜於在公出蒞藩垣振紀綱而率屬俾膺節鉞往撫荆襄殫力抒誠克荷封疆之寄民安吏肅正資屏翰之猷疴疾忽嬰眷懷良切許子之省侍遣良醫以載馳尙冀速瘳竟聞溘逝彝章備舉葬祭從優特頒琬琰之章丕煥松楸之色諡曰勤恪象爾平生於戲功存保障允爲百職之楷模恩篤始終永荷九重之寵命式垂奕世誕被弘庥雍正三年八月十四日

維雍正三年十月初五日皇帝遣禮部侍郎三泰諭祭於光祿大夫

巡撫湖廣等處地方兼提督軍務都察院右副都御史加六級諡勤恪納齊喀之靈曰任典封疆實賴拊循之績恩施綸綍爰酬保障之功念夙夜以杼忱俾始終而受眷爾納齊喀持身謹恪秉性樸誠歷職郎曹諳兵刑之規畫宣猷岳牧著屏翰之聲稱朕以荊楚爲要區特授節旄之重寄廉隅足式官吏賴其激揚綏又有方軍民資其輯睦俄疾疢之見告即璫樂以頻頒方冀漸差遽聞淪謝錫嘉名以象行樹豐碣以增榮特遣專官以陳祀事於戲風清檠戟邇未泯之勤勞光被泉扃昭常新之渥寵苾芬攸薦尙克歆承

原任禮部尙書加贈太傅諡文端顧八代碑文國家褒崇舊學眷念前勞其有品望重於班聯經史陳於朝夕勵靖共而匪懈宜寵錫之加優所以表嘉型昭茂典也爾顧八代純粹宅衷端方制行早受知於聖祖洵奉職於清班出贊軍麾佐蕩平之謀略入司典禮矢夙夜

之寅恭命講讀於內廷効恪勤於歷歲論聖賢之奧義深契朕心聞性道之微言懋抒誠悃比老成之告謝誼篤始終緬模範之猶存禮隆贈卹特頒祭葬載復官階晉爵秩於三公垂琬琰於百世易名象行曰文曰端於戲睠懷素履師資之益難忘誕彼新恩耆舊之恩彌切絲綸代賁竹帛流光雍正四年

皇清誥封資政大夫佐領兼護軍統領承理護軍統領事加二級赫公神道碑文雍正四年丙午歲五月朔二日叔父卒於官本年六月十一日葬於祖塋芳弟傳柱立將述叔父之懿行以誌不朽而屬草於芳芳不文奚敢言操觚事雖然芳於叔父猶子也芳而不言其何以使叔父之令德表彰於後世哉叔父諱赫騰額字子九生而岐嶷不苟言笑惟至孝持身簡而御下寬與朋友交始終如一自念世受國恩情深報效忠愛之忱溢於眉宇始仕民部筆帖式黽勉職大司

農以下無不敬而愛之旣而襲佐領以賢能特簡治揚州運河疏濬有方公私咸賴事竣之日一塵不染揚州人至今稱之官侍衛以小心勤謹選送澤布尊丹巴胡土克圖到西藏未幾管護軍參領承理護軍統領事潔已奉公正身率屬羣僚案服其風裁兵弁深其愛戴方謂水膺遐齡詎意命隨星隕享年有八溘然一朝遂成千古易簣之日人人流涕非盛德感人之深入人之切烏能若是乎芳也情關一本痛切九原想象音容徒形蒙寐雖言之無文不足以傳叔父立身行己之萬一然後之人遇邱墓而與思得以彷彿叔父之梗概者在於斯碑芳安能已於言乎芳安能已於言乎銘曰邦之彥兮家之賢忠孝性生歸受全豐碑峯律何巍然佳城鬱鬱慶縣縣丙子舉人佐領散騎郎加二級侄石芳拜撰增廣生音布書孝男傳柱立

雍正五年歲次丁未二月吉旦立

雍正四年九月二十六日皇帝御祭遣禮部員外郎童仕虎與原任正藍旗副都統署都督同知管河南南陽府總兵官事董玉祥之靈曰鞠躬盡瘁臣子之芳踪賜卹報勤國家之盛典爾董玉祥性行純良才能稱職方冀遐齡忽聞長逝朕用悼焉特頒祭葬以慰幽魂嗚呼寵錫重壚庶享沐匪躬之報名垂信史聿昭不朽之榮如爾有知尙克歆享雍正五年歲在丁未夏月二十日丁丑立

原任王府長史諡果毅額爾德黑碑文□朕惟憫賢勞而賜卹所以勸功追隆典以表幽亦由教孝雖松楸之已舊俾泉壤之如新爰沛綸言用昭珉刻爾額爾德黑昔仕藩僚屢隨軍伍身能奮勇歷戰陣而愈雄職在從征著勤勞而不伐功因暫掩賞未及身今爾子噶爾弼願辭議叙之勳請作移褒之典朕深懷卹舊獎効力於師中俯允陳情特追崇於格外爰勒文而賜諡且加秩以賜碑於戲不辭勞瘁

於生前是用名標華碣仍被寵光於身後依然榮賁幽阡爲臣子者
尙其式諸雍正五年□月□日

維雍正六年歲次戊申七月庚戌朔越二月八日丁丑遣禮部右侍郎仍兼管太常寺事孫卓皇帝諭祭復行賞給一等公鄂備之靈曰體大公以馭世恩威並用而皆宜考實事以衡人功過具存而不掩惟睠懷於壯烈迺特沛夫鴻於施爾鄂備賦性矜豪秉姿果勁當世祖開基之運爵列上公逮聖祖繼緒之初位叨元輔權重而每多僭妄秩崇而遂肆驕盈咎戾已深刑章莫追念成勞而感惻身經百戰衝授世職之榮階朕恭覽實錄以披尋追念成勞而感惻身經百戰衝勁敵以長驅勇冠三軍攻堅城而必克知勲庸之甚鉅洵瑕疊之可蠲俾紹土茅之封並頒牲醴之奠於戲勤勞未泯堪留信史之輝閱重高爰作力臣之勸靈其不昧享此苾芬

太子太傅武英殿大學士兼吏部尙書加二級諡文恭富寧安碑文
朕惟輔昇平之政理職重中台揚赫濯之聲靈任歸上將其有歷內
外而克彰譽望閱初終而勿替誠勤則垂信史以留勞勒豐碑而紀
烈爾富寧安秉心恪愼立操潔清佐統軍而掌旅禁營貳農部而持
籌天庾旋司邦憲勵澄肅之風裁再踐文昌著端方之績效際聖祖
申威之會簡授旌麾當朕躬纘緒之初擢居鼎鼎端凝之度洵濟美
於相門訓練之方復宣勞於帥府□資毗倚忽感凋零設祭特遣夫
專官賜金用資其全葬載稽彝典定諡文恭於戲懋報□之宏猷位
兼將相酬致身之大節禮備哀榮其載在青珉揭諸隧道式昭久遠
聿表寵光雍正六年八月二十三日

領侍衛內大臣兼佐領加五級追封伯銜加贈勤愼諡號馬武之碑

奉天承運皇帝制曰地當禁近身依日月以爲光位冠班聯氣壯風雲而動色宜賁顯休之命用酬翼衛之勞爾管侍衛內大臣馬武附鳳雄才材珥貂偉望首扈六飛之蹕清漢扶輪獨居七校之先重霄捧日豈止嬾於圻父俾作爪牙實亦賴爾元臣有同心膂欣逢慶典爰沛彤綸宜沐殊施以彰丹悃茲以覃恩特授爾階光祿大夫錫之誥命於戲自天有喜祇應左右先知後國宣勤尙冀始終匪懈敬承顯命永荷恩光初任六品官二任三等侍衛三任佐領四任二等侍衛兼佐領五任鑲白旗漢軍副都統六任鑲白旗漢軍副都統七任鑲白旗護軍統領又左翼前鋒統領八任鑲白旗蒙古都統兼內務府總管奉宸院卿管侍衛內大臣佐領九任本職雍正六年九月二十七日

維雍正六年歲次戊申九月戊申朔越二十七日甲戌皇帝遣經筵

講官禮部尙書加二級常壽諭祭太子太傅武英殿大學士兼吏部
尙書加二級諡文恭富寧安之靈曰綸扉贊化標風度以率百寮幕
府臨戎播聲威而張九伐念蓋臣之盡瘁頒茂典以飾終爾富寧安
秀挺高門榮躋貴仕倉儲是掌遂崇風憲之班邦禮攸司旋綜銓衡
之任入登政府資舟楫之良材出握軍麾統熊羆之雄鎮秉端方以
立品廉慎夙彰本敬恪以持躬勤勞懋著眷衷懷之匪懈謂精力之
未衰冀延耄耄之齡尙展謨猷之效忽聞凋謝深切軫傷乃賁徽章
聿加優卹賜帑金而營兆議諡法以易名用設几筵式陳牲醴於戲
翊星雲之景運業紀青編沛雨露之殊恩光流黃壤爾靈不昧庶克
歆承

領侍衛內大臣兼佐領加五級贈伯爵諡勤恪馬武碑文朕惟恩隆
念舊垂渥澤於泉扃禮重飾終錫嘉名於琬琰眷成勞之弗替宜異

數之頻邀意至厚也爾馬武坦白居易心和平成性趨龍墀而嚴宿衛
隨豹尾而扈宸遊堪寄腹心弗離左右皇考深嘉其敬慎爾誠無間
於初終閱五十年有如一曰朕眷惟勞績方篤倚毗遽告沈疴良深
垂念遣皇子以宣溫諭賜御醫而視良方更資兼金特加世秩疊頒
恩命冀永天年溘逝忽聞軫懷彌切贈之伯爵加子祭筵沛逾格之
鴻施詳易名於素行溯多年之宣力盡職惟勤鑒方寸之自持視身
以恪考之謚法爾實攸宜式樹豐碑用彰優卹於戲雲凝宅兆猶存
奉國之忱日麗松楸永著酬庸之典垂諸奕世不亦休歟雍正六年
九月二十七日

領侍衛內大臣公品級諡愨敬鑲黃旗殷德碑文朕惟宿衛大臣近
光華於殿陛上公高爵申錫命於組珪其有恪慎持躬公忠奉國則
生前既蒙夫渥眷身後復被以殊榮爾殷德賦質端凝秉心淳實選

材勲胄始効職於御閑擢雋羽林遂服官於禁地膺承家之茅土兼
統戎行領扈蹕之班聯仍參密議久經歲序胸懷備見其樸誠洊歷
階資器度彌形其恭謹比因夙疾頻予休閒尙冀享夫康寧何遽聞
於徂謝徽章用煥卹典從優旣原賚以治喪仍全資其營兆諡之愬
敬表厥勤勞於戲珉石嵯峨式壯川原之色松楸蔚藹聿霑雨露之
恩備載寵光永昭奕世雍正六年

皇清誥贈光祿大夫佐領兼總理內務府三旗火器營事務金公神
道碑國家受天府命肇建丕基弘億萬年無疆之曆其間雄駿不羣
之材應時奮跡致身佐命重庥襲慶穀其人後人所謂凡周之士不
顯亦世宜得大書特書彰厥遭逢之盛者也公姓金氏諱新達禮朝
鮮翼州人性果敏多幹略我太祖高皇帝勃興遼海神武天授疆圉
式郭任賢使能俾各盡其謀力一時人心翕然嚮順公於天聰元年

率其弟音達禮三達禮季達禮來歸太宗文皇帝任一通事官摘發奸弊折其機互間諜莫逞越二年朝鮮歸附人戶益衆分置佐領太宗文皇帝察公忠惻特命入內務府授佐領兼總理三旗火器營事務公在軍首尾十餘年每於危急時獨身奮死推鋒陷陣爲士卒先數立奇功著聲疆場太宗文皇帝再四褒嘉恩禮踰同列白金文綺子女良馬之賜不可備紀世祖章皇帝素悉賢勞方欲大用而公遽以勞勩卒於官年五十有一時論惜之公生於天命丙午年九月二十二日卒於順治十四年四月初七日墓在順天府宛平縣西山之原以孫令散秩大臣常明恭遇覃恩贈光祿大夫娶妻姜氏繼娶林氏皆贈一品夫人子三人長噶布拉三等侍衛次胡住二等侍衛參領兼佐領總理內務府三旗火器營事務次花住襲佐領任都虞司員外郎總理內務府三旗火器營事務孫七人長巴朗次色林次檀保次四格次常明由佐領累陞散秩大臣兼內務府總管奉宸苑正